


廿二史攷異 一四





異攷史二廿

(四十)



撰昕大錢

廿二史考異卷八十七

元史二

世祖紀一

中統元年親王合丹、阿只吉率西道諸王塔察兒也先哥、忽刺察兒、瓜都率東道諸王合丹太宗之子阿只吉者察合台之孫塔察兒者斡赤斤之孫也先哥卽移相哥哈撒兒之子忽刺忽兒卽忽列虎兒哈赤溫之孫瓜都者別里古台之子。

李魯海牙、劉肅竝爲真定路宣撫使。李魯海牙卽布魯海牙。

賜親王穆哥銀二千五百兩。睿宗子末哥大王也。

賜先朝皇后帖古倫銀二千五百兩。皇后斡者思銀二千五百兩。兀魯忽乃妃子銀五千兩。案后妃表世祖四斡耳朵無斡者思兀魯忽乃二人而帖古倫大皇后守世祖大斡耳朵非先朝后也二者當有一誤。

二年十二月詔封皇子眞金爲燕王領中書省事。案元史本紀敍事多重複如中統二年十二月書封皇子眞金爲燕王領中書省事而三年十二月又書封皇子眞金爲燕王守中書令至元十二年書割

江東南康路隸江西省而二十二年又書分江浙行省所治南康隸江西行省二十三年又書以南康路隸江西行省至元十五年書復立河中府萬全縣全當作泉下同而十六年又書復立萬全縣隸河中府至元十五年書改京兆府爲安西路而十六年又書改京兆爲安西路至元二十一年五月書賜北安王螭紐金印而七月又書賜皇子北安王印至元二十五年書改西南番總管府爲永寧路而二十七年又書改西南番總管府爲永寧路至元二十九年書罷徽州路錄事司而三十年又書罷徽州錄事司元貞元年書陞贛州路之寧都會昌二縣爲州而大德元年又書陞寧都會昌縣爲州竝隸贛州路大德元年書陞全州爲全寧路而二年又書改泉州爲泉州府泉即全之譌至大二年書封知樞密院事容國公牀兀兒爲句容郡王而延祐三年又書封牀兀兒爲句容郡王延祐四年書以大寧路隸遼陽省而五年又書以大寧路隸遼陽省延祐四年書陞靖州爲路而至治二年又書陞靖州爲路延祐五年書以者連怯耶兒萬戶府爲右衛率府而六年又書以者連怯耶兒萬戶府軍萬人隸東宮置右衛率府至治元年書龍虎山張嗣成來朝授太元輔化體仁應道大真人而泰定二年又書加嗣漢三十九代天師張嗣成太元輔化體仁應道大真人至治三年十月辛丑書諸王怯別遣使來朝而甲寅又書諸王怯別遣使來朝泰定元年正月書敕封解州鹽池神爲靈富公而致和元年四月又書改封鹽池神曰靈富公泰定元年三月書遣湘寧王八刺失里出鎮察罕腦兒而四年三月又書命親王八刺

失里出鎮察罕腦兒。元統二年書四川大盤洞蠻謀谷什用、遣男謀者什用來貢方物。卽其地立盤順府。而至正十二年又書四川未附生蠻向亞甲洞主墨得什用出降立盤順府。皆一事而兩三見者也。

世祖紀二

三年二月丙申以興松雲三州隸上都。案陞開平爲上都在四年五月戊子升望雲縣爲雲州松山縣爲松州在四年五月庚子不應此時先有上都及松雲二州之名據下文四月庚戌以望雲松山興州課程隸開平府可證其時不稱上都也。又是年十二月戊寅書割北京興州隸開平府與此文亦重複。四月賜諸王也相哥金印卽移相哥也。

至元元年給諸王也速不花印案宗室世系表別里古台之子闊端之孫皆有名也速不花者考中統三年賜廣寧王瓜都印乃是別里古台之孫卽也速不花之子不應子之賜印乃先於父則此給印者必闊端之孫矣。

與諸王玉龍荅失阿速帶昔里給等玉龍荅失三人皆憲宗子阿速帶表作阿速歹昔里給表作昔里吉。

世祖紀三

二年分四親王南京屬州鄭州隸合丹鈞州隸明里睢州隸寧羅赤蔡州隸海都它屬縣復還朝廷案

食貨志。太宗丁巳年分撥合丹、滅里、合失、闊出、汴梁在城戶。至是改以屬州戶賜之也。明里卽滅里。寧羅赤者，闊出之孫。卽失列門之子。海都則合失之子。

五年封諸王。習怯吉爲河平王。卽憲宗子昔里吉。怯字疑譌。

世祖紀四

九年賜南平王禿魯銀印。禿魯定宗之孫。表作禿里。

詔諸路府州司縣達魯花赤管民長官兼管諸軍奧魯。經世大典序錄云：凡軍出征戍家在鄉里曰奧魯。州縣長官結銜兼奧魯官以莅之。

世祖紀五

十年命諸王阿不合市藥師子國。阿不合疑卽旭烈兀大王之子。阿八哈也。

十二年駢馬長吉。長吉表作昌吉。

詔中書右丞廉希憲行中書省于江陵府。案十三年又書以北京行中書省廉希憲爲中書右丞。行中書省事于荊南府。荊南卽江陵府。亦一事而重見也。

世祖紀六

十三年二月夏貴以淮西諸郡來降。惟鎮巢軍復叛。貴遣使招之。守將洪福殺其使。貴親至城下。福始降。

阿朮斬之軍中。案宋史忠義傳。貴旣臣服招福不聽。使其從子往福斬之。大兵攻城久不拔。遣貴至城下。好語語福。請單騎入城。福信之。門啓而伏兵起。執福父子。屠城中。貴佐殺其二子。次及福。福大罵數貴不忠。請身南向死。以明不背國也。福之節義皎皎如此。元史謂貴之城下而福降者。誣也。見姜才

福事附

十四年二月甲戌。西川行院不花率衆數萬至重慶營浮屠關。造梯衝將攻之。其夜都統趙安以城降。張珏艦船江中。與其妻妾順流至涪州。元帥張德潤以舟師邀之。珏遂降。案宋史忠義張珏傳。張德潤復破涪州。執守將程聰。在十四年六月。宋史於德祐二年之後書明年。元史本紀則書于年七月。其時重慶尙未被兵。何緣珏有出降之事。又據本紀。是年八月始詔不花行院四川。則是春不花尙未至四川。史所載殊疏舛矣。宋史珏傳。至元十五年二月。珏率兵出薰風門。與大將也速解兒戰扶桑埧。珏兵大潰。城中糧盡。趙安以書說珏降。不聽。安乃與帳下韓忠顯夜開鎮西門降。珏率兵巷戰不支。歸索鴉飲。左右匿鴉。乃以小舟載妻子東走涪。明日萬戶鐵本兒追及于涪。執之送京師。珏之被執年月。當以宋史爲正。汪良臣傳云。十五年春。張珏悉衆鏖戰。良臣奮擊大破之。珏所部開門納降。珏潛遁。與宋史年月相合。紀誤書於前一年。其云出降亦誣也。紐璘傳。制置使張珏遁。追至涪州擒之。亦不云出降。

十二月賜諸王也不干燕帖木兒等。案宗室世系表。宗王名也不干者三人。一爲塔察兒之子。一爲忽

魯歹之子一爲合丹之子未審所賜何人燕帖木兒則表未見其名。

世祖紀七

十五年八月制封泉州神女號護國明著靈惠協正善慶顯濟天妃。案本紀至元二十五年六月詔加封南海明著天妃爲廣祐明著天妃。大德三年二月加封泉州海神曰護國庇民明著天妃。天祐二年十月加封天妃爲護國庇民廣濟福惠明著天妃。至正十四年十月加號海神爲輔國護聖庇民廣濟福惠明著天妃。此天妃封號由二字加至十二字之次第也。祭祀志云神號積至十字指天祐封號而言祝文同此所載封號二字蓋非元制也以二十五年加封四字推之則至元初封止有明著二字紀殆誤矣汪楫使琉球雜錄云天妃光宗朝封靈惠妃寧宗朝加封助順又加顯衛護國助順嘉應英烈妃理宗朝加封協正又封靈惠助順嘉應慈濟妃尋加善慶又進顯濟妃。

十一月行中書省自揚州移治杭州案至元二十一年始徙江淮行省於杭州不應此時卽有移治之事邵晉涵曰考地理志揚州杭州兩路俱不載至元十五年移行省事惟集慶路云至元十四年初立御史臺於揚州旣而徙杭州又徙江州又還杭州二十三年自杭州徙治建康然則本紀所云十五年自揚州徙治杭州者乃行御史臺非行中書省蓋傳寫誤爾。

世祖紀八

十七年二月命梅國賓襲其父應春瀘州安撫使職瀘州嘗叛應春爲前重慶制置使張珏所殺國賓詣
闕訴冤詔以珏界國賓使復其父讎珏時在京兆聞之自經死案宋史忠義傳珏至安西卽京兆趙老
庵其友謂之曰公盡忠一世以報所事今至此縱得不死亦何以哉珏乃解弓弦自經廁中與此紀互
異未詳孰是

六月安西王薨刊本作西安誤罷其王相府案趙炳傳至元十五年十一月王薨名臣事略亦云十五年冬王
薨十七年王相府罷然則王相府之罷在王薨後二年紀誤以爲同時事諸王表秦王忙哥刺卽安西秦王至元十七年薨此又因本紀而誤

十月賜雲南王忽哥赤印案忽哥赤於至元四年封雲南王賜印八年爲寶合丁等毒死此紀所書蓋
以其子也先帖木兒襲封雲南王仍以父印賜之耳諸王表雲南王也先帖木兒至元十七年襲封可
證此文之誤

十二月以高麗國王王疇爲中書右丞相案王疇爲丞相不見於宰相表蓋授爲征東行中書省右丞
相耳

世祖紀九

十九年正月諸王昔里吉與脫脫木兒蠻木忽兒撒里蠻等案宗室表旭烈兀大王歲都哥大王之孫

俱有脫脫木兒未知孰是。蠻木忽兒者，阿里不哥之子，藥木忽兒也。撒里蠻者，玉龍荅失之子。六月己丑朔日有食之。天文志作乙丑，刊本之譌也。案是年六月朔日食而七月戊午朔又書日食，天文志亦同。邢雲路曰：推是年六月朔交二十四日有奇，不入食限，不應食。七月戊午朔交九刻，入食限。是日已時日食合。何元史重載六月朔食耶？從古無比食之理。郭守敬論之詳矣。豈以守敬十八年方定授時而不辨此？此必修史者誤書之也。

二十年六月，命諸王忽牙都設斷事官。疑卽鎮遠王牙忽都也。

世祖紀十

二十一年閏五月，封法里刺王爲郡王，佩虎符。案：諸王表，怯里歹郡王至元十一年賜印，此法字，疑怯之譌也。表云十一年而紀書于二十一年，蓋表脫二字。

世祖紀十一

二十四年二月，敕諸王閣里鐵木兒。卽廣寧王徹里帖木兒。

世祖紀十二

二十五年正月，賜諸王火你赤銀五百兩。案：太宗子合丹大王之子有火你。賜諸王亦憐真部曲鈔三萬錠。闊端太子之孫。

十二月賜案答兒禿等。案答兒禿者帖木兒駙馬之賜號也。

見特薛禪傳

二十六年四月立諸王愛牙赤投下人匠提舉司于益都。案世祖第六子名愛牙赤此云諸王則非皇子也宗室世系表斡赤斤位下有愛牙哈赤王滅里位下亦有愛牙赤大王。

世祖紀十三

二十七年十一月降南雄州爲保昌縣韶州爲曲江縣。案至元十五年立南雄韶州二路總管府其時蓋以路領州以州領縣設官猥多至是始省州存縣故云降也。

二十八年正月給諸王愛牙赤印。案二十二年已賜皇子愛牙赤銀印則此給印者別是一人也。以札散禿禿合總兵于巒古之地禿禿合卽土土哈。

成宗紀一

至元三十年乙巳受皇太子寶。當云六月乙巳有日無月。又脫文。

三十一年封駢馬闕里吉思爲唐王。當云高唐王脫高字。

元貞元年十二月賜諸王押忽禿。卽牙忽都也。

成宗紀二

二年三月郡王慶童有疾以其子也里不花代之。此當是兀魯兀台部之襲封郡王者非宗王也。考究

赤台傳有慶童而無也里不花亦不云慶童有子。紀傳互異今無從考其是非矣。傳有匣刺不花與也里不花音似相近然傳以匣刺不花爲脫歡之孫則系慶童之姪孫非其子也。九月令廣海左右兩江戍軍以二年三年更戍海都兀魯思不花部。兀魯思不花者河平王昔里吉之子。

大德二年十二月江浙行省平章政事答刺罕陞左丞相。答刺罕者哈刺哈孫也。本傳大德二年由湖廣平章政事入朝拜江浙行省左丞相未嘗平章江浙也。紀疑誤。

成宗紀三

五年十月丙辰朔。當是丙寅朔。

癸未太陰犯東井壬午車駕還大都。壬午當在癸未之前。

成宗紀四

七年三月小蘭禱岳鉉等進大一統志。小當作卜。

九月復木八刺沙平章政事案是年二月以平章政事行上都留守木八刺沙爲中書平章政事中間初未有罷黜之事非此條重出則史文有脫漏也。

九年七月以金千兩銀七萬五千兩鈔十三萬錠賜興聖太后及宿衛臣出居懷州。興聖太后卽武宗

仁宗母也。此時不當有太后之稱。史臣因實錄舊文。未及釐正。

十月丁丑朔。當作甲戌朔。此誤。

武宗紀一

大德五年八月與海都戰于迭怯里古之地。牀兀兒傳作鐵堅古山。

十一年六月進封高麗王王眡爲瀋陽王。加太子太傅駙馬都尉。案高麗傳。王諒成宗初年。尙寶塔實憐公主。十一年進封瀋陽王。紀當云封高麗王王眡之世子諒爲瀋陽王。不得云封眡也。又案朝鮮史忠烈王眡三十四年。王薨于神孝寺。遺教機務委付瀋陽王。則瀋陽爲諒之封明矣。

七月庚辰。案上書七月癸亥朔。庚辰爲月之十八日。不當重書七月。

御史大夫月兒魯言。舊制中書省、樞密院、御史臺、宣政院許得自選其人。它司悉從中書銓擇。近臣不得輒奏。如此則紀綱不紊。帝嘉納之。案玉昔帖不兒。世祖時爲御史大夫。賜號月呂魯那演。亦作月兒魯。又作玉呂魯。以元貞元年卒。此又有御史大夫月兒魯。不知何人。恐誤。

至大元年三月。賜定王藥木忽兒金千五百兩。案是年六月封藥木忽兒爲定王。而三月已書定王藥木忽兒。二年三月封駙馬注安即朮爲趙王。蓋由高唐王進封也。而其年九月猶書高唐王注安。皇慶二年正月。封乞台普濟爲安吉王。而至大三年。已書安吉王乞台普濟。至順元年三月。封王子阿刺忒

納答刺爲燕王。而二月已書燕王阿刺忒納答刺。至正二十年閏月。以甘肅行省左丞相阿吉刺爲太尉。而十三年五月十八年五月兩書太尉阿吉刺。皆史臣失於檢勘也。

武宗紀二

二年三月遼陽行省右丞洪重喜訴高麗國王王章。案王章卽王謙改名。予見趙孟頫書圓通寺碑篆額者爲瀋王王璋。卽高麗王也。元史作章。不从玉旁誤。

六月宣政院奏免僧道也里可溫答失蠻租稅。案元典章有一條云答失蠻迭里威失戶。若在回回寺內住坐並無事產。合行開除外。據有營運事產戶數。依回回戶體例收差。然則答失蠻乃回回之修行者也。至元辨僞錄云釋道兩路各不相妨。今先生言道門最高。元人稱道秀才人言儒門第一。迭屑人奉彌失訶言得生天達失蠻叫空謝天賜與細思根本皆難與佛齊。達失蠻卽答失蠻。十二年上太祖聖武皇帝尊謚廟號。又上睿宗景襄皇帝尊謚廟號。案太祖睿宗廟號至元三年所上。此年惟加上尊謚耳。不當云廟號也。

仁宗紀一

皇慶元年二月賜世祖諸皇子也先鐵木兒福州路福安縣。案也先鐵木兒乃世祖子忽哥赤之子。以下文例之。當有脫文。

三年乙亥。當作己亥。

四月趙王汝安郡告饑。汝當作注。郡當作部。

二年二月壬戌。是年失書三月十一月自二月丙申以後皆三月事。自十月壬寅以後皆十一月事也。

仁宗紀二

延祐二年三月廷試進士賜護都沓兒張起巖等五十六人及第出身有差。案是年初行科舉自後每科廷試賜進士及第皆書於本紀。惟順帝元統元年賜同同李齊等百人至正十七年賜倪徵王宗嗣等五十人紀皆失書。元統癸酉之春庚申君尙未卽位闕而不書宜也。若至正丁酉之脫漏史官難辭其咎矣。

泰定帝紀一

至治三年癸巳即皇帝位于龍居河。當云九月癸巳有日無月者史脫文。

泰定元年三月冊八八罕氏爲皇后。后妃表后妃傳特辭禪傳竝作八不罕八不罕者其名也。當書宏吉刺氏不當云八八罕氏。

十月乙卯。是年失書十一月自己丑以後皆十一月事。

二年十月戊寅朔。是年失書十一月自戊申以後皆十一月事。

泰定帝紀二

三年十一月庚子。前一月辛未朔。則庚子乃今月朔日也。史不書朔脫文。又案是年失書十二月。自丁丑以後當屬十二月。

明宗紀

諱和世璵。元典章作火失刺。

悉發關中兵分道自潼關河中府入。案是時仁宗在位而周王遽興關中兵拒命是謀反也。仁宗紀不書其事。蓋深諱之。既而西行至金山。則附於西北諸叛王矣。

泰定皇帝崩于上都。倒刺沙專權自用。踰月不立君。朝野疑懼。案泰定以七月庚午崩。至八月甲午。燕帖木兒舉事爲時尙未及三旬。元諸帝卽位皆俟諸王大臣畢會議之。距前君之崩或兩月或三月初無定期。蓋其家法如是。況泰定踐阼之日儲位早定。朝野本無異議也。燕帖木兒逆謀早萌于泰定未崩之先。豈因踰月不立君。人心疑懼。始謀舉事乎。此皆實錄之誣詞。史臣不能刊正也。

文宗紀一

致和元年八月。河南行省殺其參政脫寧臺。卽脫別台也。見伯顏傳。時伯顏爲河南行省平章政事。

天祐元年九月乙丑。立太禧院。乙丑當作乙亥。

十一月己未 史不書朔脫文

文宗紀三

至順元年二月辛卯朔。案上文已書二月壬午朔。以上下月日勘校。當爲壬午朔。辛卯則月之十日也。

二月二字當屬上文給糧賑之爲句。朔字衍文。壬午刊本誤作壬申

文宗紀五

放燕帖古思于高麗。監本於燕字下錯入順帝紀中語。凡四百言。

寧宗紀

八月甲寅 上文已書八月己酉。此又書八月。

順帝紀一

至元元年八月詔以岐陽王完者帖木兒。岐陽當作淇陽。月赤察兒之孫承其祖父封號。

順帝紀二

二年十二月以甘肅行省白城子屯田之地賜宗王喃忽里。案明史哈密傳。元末以威武王納忽里鎮之。尋改爲肅王。卒。弟安克帖木兒嗣。永樂二年封爲忠順王。納忽里卽喃忽里也。

順帝紀三